

TRIKI POLITIKO?

Segundo grupo a sigui kurso avansá di historia



Un grupo di alrededor 20 persona a risibí djamars último nan sertifikado komo prueba di a sigui e kurso avansá di historia i kultura serka FuHi-KuBo. Tabata di dos biá ku a duna e kurso aki, den kua ta atendé tópikonan nobo i alabes bai mas profundo den tópikonan atendé den e kurso básiko. Foto ta mustra e grupo.

Porfin WEB drechando pipa di awa

KRALENDIJK- Porfin por nota kolaboradónan di WEB hasiendo esfuerso pa drecha un pipa di awa bou di tera riba Kaya Korona. Ya pa algun tempu por a

nota kontinuamente awa riba kaminda públiko djis dilanti di misa La Birgen di Coromoto. Probablemente e pipa di awa tabatin lèkaze i awor ta hasi trabounan pa

remediá esaki. Esaki a sòru pa algun estorbo pa ku trá-fiko pero e inkumbiniensia no a dura largu. E potrètnan ta ilustrá kolaboradónan di WEB hasiendo nan trabou.



Yunan i famia di

Gabriel "Gebby" J.C. Saleh

ta gradisí tur ku a kombibi, musta atenshon, na ora di fayasimentu i entierro. Kada atenshon tabata un gran sosten i konsuelo.

Alabes kier a partisipá ku **tin tres santu sakrifisio di misa na parokia San Bernardo, e siguiente dianan: djabièrnè 21yùli, djasabra 22 di yùli i djadumingu 23 yùli pa 7'or di anochi.**

Aseptá esaki komo un invitashon personal.

Consuelo
Memorial

Kaya Maria C. Hellmund-Boom 11 • Bonaire • CN
T/F: (+599) 717 3243 (24h) • info@consuelomemorial.com •

Ku doló na nos kurason pero konforme ku Dios su boluntad, nos ta partisipá fayasimentu di nos ser stimá

Alfred Nemesio Inias

*01-11-1951 - †12-07-2023

Na nòmber di su rumannan:

Reaminda Inias
Aurora Suart-Inias
George Inias

Su sobrinu/an:

Hernandez i esposa i yunan
Jenny i yu
David

Carlos i famia
Karijka i famia
Gairo i yunan
Darienine i famia
Eugene i esposa i yunan
Jokasta i yunan
Ludwina i yunan

Diona

Geordan

Su amigunannan:

Benny i famia, Marcel i Bakero

Famia:

Inias, Pikeri, Martis, Mercelina, Lourens, Anthony, Janga, Wanga, Pourièr, Boekhoudt, Jeanty, Craane, Martina i Suart.

Nos diskulpa si den e momentunan di tristesa nos por a lubidá un famia i/ò konosi.

Akto di Entiero ta tuma lugá djasabra 22 yùli Kondolensia ta di 9'or pa 11'or mainta na Consuelo Memorial sigui pa respons despues ta hiba nos defunto na su último lugá di sosiegu den santana katólíko na Playa.

Nos ta lamentá ku despues di entierro nos no por risibi bishita di kondolensia na kas.



Pronóstiko di tempu pa Boneiru

Djárason 19 te Djaweps 20 Yùli 2023

Parsialmente te hopi nublá i chèns pa áwaseru

Prinsipalmente awe tin chèns pa algun áwaseru. E temperatura máksimo lo ta aproksimadamente 32°C, e temperatura mínimo mas o ménos 27°C. E bientu ost ta basta fuerte te fuerte, 5 te 6 Bft.

Altura di ola: 2.0-2.5 m (5-7 pia)

* Altura di ola válido pa laman grandi

TRIKI POLITIKO?

KRALENDIJK- Tin indikashon fuerte ku investigashon penal na e persona òf personanan ku a lèk informashon konfidensial enserá OVO tabata un triki polítiko.

Durante e periodo di elekshon elektoral último, den pleno kampaña polítiko e situashon di OVO a bin amplio den publisidat. OVO ta básikamente un akuerdo òf kontrato ku

gobièrnu ta sera ku un persona òf kompania pa esaki hasi sierto tareanan den e aparato. Informashon privá i delikado, entre otro salario risibí, a bira públiko. Esaki a sòru pa gran konsternashon i a demanda pa sa ta ken a lèk esaki.

Dado momentu Entidat Públiko Boneiru (OLB) a hasi denuncia penal despues di un posibel filtrashon di dato. Maritza Valdink komo Hefe di Departamentu di Asuntunan Huridiko i General (JAZ) a konfirmá esaki i e tabata basta firme “OLB ta tuma hopi na serio e posibel filtrashon di informashon konfidensial sin permiso”, el a bisa, mientrastantu mas ku 3 luna pasa.

Awor BONERIANO ta informá na e estado di e investigashon aki ku den kampaña polítiko a sòru pa basta publisidat. Nos a

tuma kontakto ku Valdink pero ainda no a kontesta nos mensahe. Konsekuentemente nos a aserka Kuerpo Polisial Hulanda Karibense (KPCN). E bosero a splika ku el a manda pidi informashon serka e hefe di departamentu di reshèrshi. “E ta kòrda e kaso pero e mester chèk ku e reshèrshinan ku a atendé e kaso pa e por duna mi mas infor-

mashon”, segun e bosero.

Tambe nos a aserka Ministerio Públiko (OM) pa haña mas informashon. Lamentablemente e persona enkargá ku e investigashon aki tabata den algun konsulta i no por a duna e informashon deseá. BONERIANO lo sigui vigilá e investigashon aki i lo publiká asina haña kontesta di JAZ, KPCN òf OM.

Joba van den Berg ta bandoná Parlamento despues di elekshon

Karibe Hulandes ta pèrdè un miembro hopi enbolbí

KRALENDIJK – relashon di Reino, pero Joba van den Berg di CDA djárasen a duna di konosé ku despues di elekshonnan di 22 di novèmber e no ta regresá den Tweede Kamer. Ku esaki e komishon di relashon di Reino ta pèrdè un miembro hopi enbolbí ku e partinan Karibense di Reino. Miéntras di otro banda Wasilla Hachi di D66 sí netamente ke bin bèk.

Na 2017 van den Berg a bira Parlamentario. Despues di elekshonnan na 2021, primeramente el a pèrdè e barku, pero el a regresá primeramente komo remplasante i desde sèptèmber 2021 definitivamente bèk. Política di CDA ta konsistí di poko partisipante no konfiabel na reunionnan di e komishon di relashon di Reino di Tweede Kamer.

Eks miembro di Tweede Kamer, Wassila Hachi di D66, netamente ke hasi come-back den Tweede Kamer. Di 2010 te 2016 e tabata bosero di

relashon di Reino, pero a dispersé komo un ladron den anochi, lagando tur kos i tur hende den bruashon. Algun siman despues el a resultá na Merka, manera e mes a bisa, pa yuda ku kampaña di Hillary Clinton. Paso-bra e no ke a tuma distancia di plaka di espera, D66 a menasá di kore kuné. Esaki no a resultá paso-bra Hachi mes a disidí di entregá su retiru komo miembro di e partido.

Den e último añanan Hachi a demostrá simpatia pa pensamentunan di Donald Trump i Thierry Baudet. Tambe e tabata, entretantu kombertí den Moslim, via Speakers Academy hür su mes komo oradó na rason di 7.500 euro pa un ora. Awor el a stipulá su mes komo kandidato pa lider polítiko di D66. Su mishon ta pa prohibí partidonan polítiko, pa despues siudadanonan so ainda por partisipá riba título personal na elekshonnan.



Popularidat ta relativo
P'esei un propio estilo
No solamente pa ta eksitoso
Sino sigur mas balioso

BròKèS 93.5 FM
pokopoko pero sigur mas i mas hende ta ...

Skuch'è
Telefon/ WhatsApp +599 701 0935
www.radio935bonaire.com

Boneriano hefe di 'Handhaving'

KRALENDIJK- BONERIANO ta dispone di informashon ku Marlon Richardson a bira e hefe nobo na Direktorado Supervishon i Mantenishon di Lei (Handhaving). Porfin tin un boneriano den e tipo di funshon asin'aki.

Richardson tin un trayektorio basta largu komo hefe di seguridat na MCB group pero tambe miembro di reshèrshi. Parse ku e paso aki pa postulá Richardson den un fushon primordial asin'aki, Entidat Públiko Boneiru (OLB) ta skucha e gritu ku tin basta tempu den komunidad. Pa traha espasio pa hendenan lokal pa ehersé funshonnan di liderato den aparato

gubernamental. Richardson ta kasá ku subrina di Papi Cecilia.

Di fuentenan digno di krédito nos a haña e infor-

mashon importante aki pero OLB no a konfirmá ni desmentí e informashon.



HUSTISIA



Krímen no ta paga

KRALENDIJK- Na momentu ku un persona benefisiá finansieramente di un delito penal pues un krimen, Korte por disidí ku e mester paga e kantidat di sèn bèk na gobièrnu.

Pa aña 2023 tin algun kaso ku Ministerio Públiko (OM) ta trese dilanti hues pa kita sèn for di personanan ku a saka benefisio for di un krimen.

E konsepto di henter e proseso aki ta ku krimen no ta paga pues no por tin

niun klase di ganashi for di kriminalidat.

Na aña 2022 tabatin vários kaso den kual Korte a sentensia un persona na paga daño i perhuisio pero ainda no a kita sèn for di niun persona ku a risibí un kondena. Un kaso ku a hala hopi atenshon i publicidat ta e kaso di Eugenio J., despues ku el a sinta su kastigu di prizòn pa transportashon di 60 kilo di kokaina, OM a eksigí pa e paga 6.6 mion dòler

na estado hulandes. Korte den Promé Instansia a bai di akuerdo ku esaki pero J. a apelá e desishon. Ainda mester atendé e apelasjon aki.

Mester menshoná ku e montante ku Korte kita durante e proseso ta bai pa Ministerio di Finansa, den e pòt di rekursjonan general. Esaki ta bira un entrada pa gobièrnu ku ta usa e montante aki pa paga su gastunan.

Edifisio di Korte ainda un problema

KRALENDIJK- E idea pa Boneiru haña un edificio nobo ku lo fungi komo lokalidat pa instansianan hudisial ta algu ku probablemente lo no bira realidat riba término kòrtiku. Komienso di aña 2022 mr. Maurits de Kort, a splika durante presentashon di e relato anual di aña 2021 ku e plan ta pa bin ku un edificio den kua lo ubiká partnernan den kadena di hustisia. Pues un edificio kolektivamente pa Korte, Ministerio Públiko, Reclasing i probablemente otronan ku tin di aber ku hustisia.

Pero awor por lesa den e relato anual di aña pasá ku den e próksimo añanan no por ferwagt esaki.

Aña pasá Korte den akuerdo ku Entidat Públiko Boneiru (OLB) a hasi un mantenshon grandi na e edificio na Fort Oranje. Esaki sigur tabata nesesario mirando e esta-

do di e edificio. BONERIANO ku ta reportá tokante kasonan den korte na vários okashon a trese dilanti e estado di e edificio. Especialmente durante i despues di un yobida di áwaseru praktikamente e sala di korte ta inadekuá pa tene huisio.

Mantenshon

Miéntas un lokalidat nobo no bira realidat, mester mantené e edificio aktual. Trabou di mantenshon na edificio di korte di hustisia ta progresando. Tur ku bishitá korte di hustisia, por nota e adaptashonnan ku a hasi pa motibu di e trabounan di mantenshon na e edificio. Ta konosí ku mester di mantenshon intensivo na e edificio na Fort Oranje.

Tin basta atenshon pa mantenshon di e edificio i alabes reforsá e seguridat. Ta konsiente ku mester di seguridat ku ta kuadra ku

korte di hustisia. Parti di e mantenshon grandi tabata pa drecha dak di e edificio especialmente e parti ku e archivo ta ubika. Tambe a fèrf e edificio paden i pafó.

BONERIANO na vários okashon a trese dilanti e falta di siguridat na e edificio aki. Últimamente por ripará basta desaroyo riba e tereno aki. No solamente tin kámaranan di vigilansia pero ya a hasi petishon pa haña pèrmit pa instalá un mashin pa skèn hende i ekipahe riba metal.

Den e relato anual di aña 2021 ta bisa ku e proyekto pa ku un konstrukshon nobo ta hopi leu, pero ainda e lokalidat no ta konosí. Tampoko na ki momentu definitivamente lo kuminsá ku konstrukshon di e edificio nobo. E relato anual 2022 ta duna un impresjon ku por lo pronto esaki lo no kristalisá.

Entrevista ku hues mr. Joost Veerman

KRALENDIJK- Korte di Hustisia a hasi un entrevista ku hues mr. Joost Veerman tokante su eksperensia na Boneiru. Korte a relatá esaki den nan relato anual di 2022.

Komo un empleado 'nobo' di Hof, kiko ta e kos 'nobo' ku bo ta trese den bo trabou?

Mi ta haña esaki un pregunta difisil. Loke koleganan ta bisa di mi ta ku mi ta un hues aktivo i práktiko. Den kasonan ku ta rekerí esaki lo mi bai den profundidat pero mi ta mas práktiko i kreativo kaminda por. Mi ta pensa specialmente den un solushon hustu. Tambe mi por ta hopi dirèkt, pues mi ta kla den loke mi ta pensa i bisa. Tin bia esaki por primi un tiki, specialmente riba e islanan aki kaminda hende ta mas reservá. Tòg mi ta ripará ku hende ta apresia ora bo ta bisa loke bo ta pensa. Esaki ta konta pa koleganan pero tambe pa un sospechoso òf partidonan durante un huisio. E klaridat aki ta habri e posibilidat pa ku un kontradiksjon òf diskushon ku por konduzí solamente na un mihó resultado òf desishon.

Kon bo ta mira bo mes den Hof?

Dies aña pasá mi a fungi komo hues durante 4 aña na Kòrsou. Despu-



es mi a regresá Hulanda. Awor mi ta na Boneiru for di sèptèmber 2022. Den hopi sentido, mi trabou aki ta diferente for di mi trabou na Kòrsou e tempu aya. Mi ta e úniko hues na Boneiru. Esei ke men ku banda di mi trabou komo hues, mi ta sinti mi responsabel pa e funshonamentu general di korte aki na Boneiru. Mi ta trata na informá e vise presidènt na Kòrsou Maroeska Scholtemas mas mihó posibel tokante e desaroyonan aki i tokante loke Boneiru mester.

Ki ta e desaroyonan ku bo ta eksperensia na Hof?

Hopi kos ta kambiano na Boneiru. Ta bira mas drùk. Algun aña pasá tabatin apénas 15 mil siudadano awor ya tin 23 mil. Aktividatnan ekonómiko ta oumentá. Esaki ta hiba na mas kaso, kasonan sivil i kasonan atministrativo mas kompliká. Kriminalidat tambe ta oumentá i e kantidat di kasonan penal. Nos mester adaptá nos organisashon. Ya nos ta hasiendo esaki kaba: Aña 2023 lo bin un segundo hues, un sekretario i un kolaboradó atministrativo mas.

Kiko bo a nota e promé lunanan na Hof?

Apesar di e retonan di un organisashon ku tin 4 diferente filial riba 4 diferente isla, tòg tin un gran union. Koleganan konosé otro i sa kon yega na otro. Kada filial ta sostené otro.

Si lo bo ke kambia algu den Hof kiko esaki lo ta?

Loke mi ke kambia na Hof ta pa koleganan ta mas habri i transparente ku otro. Nos por informá otro mihó i duna otro feedback. Esei ku e solo meta pa hasi e organisashon mihó. Duna responsabilidad i inspirá otro!

Marechaussee i polis a haña kurso kaptan pa boto di patruya nobo

KRALENDIJK -- tan na Boneiru, e asina Kolaboradónan di Koninklijke Marechaussee (KMar) i Kuerpo Polisial Karibe Hulandes, KPCN, a slag pa un kurso di kap-

tan na Boneiru, e asina yamá kurso 'Boatmaster 3'. Ku e diploma ku nan a logra, nan por kuminsá traha na Boneiru komo kaptan riba e boto di pa-

truya nobo, ku segun plan ta kuminsá nabegá na òktober. Durante e kurso di ocho dia, e partisipantenan aparte di siña operá e boto, a siña entre otro

kon pa atendé ku pagamentu di kandela i a haña teoria general. Entretantu 17 partisipante a slag pa e kurso akí.

E kurso ta nesesario pa por operá e boto nobo ku KMar i KPCN a kumpra huntu. Ta bai hasi uso di dje pa tareanan di polis di frontera riba laman, pa vigilá i patruyá riba awa i kontrolá barkunan.

Ademas e servisionan na tur momentu por asistí

Wardakosta área Kari-bense, den kasonan di akshon di búskeda i reskate, òf den situashonnan sos-pechoso.

E boto i e kaptannan nobo ta duna un aporte na e hub multidisciplinario marítimo, MMHB, ku ta un aliansa entre KMar, Duana i Wardakosta, ku ta enfoká riba hasi i mantené Boneiru sigur pa loke ta trata e parti marítimo.



Programanan di Bonaire.tv

TELBO kanal 70
Flamingo TV kanal 23

Djaweps 20 yùli 2023

12.00 Aktualidat:	Hennyson Thielman
13.00 Aki Boneiru:	Orlando (Lando) Tjin Asjoe
14.00 Herensia:	Philomena Beaumont-Janga
15.00 BAPA:	Orlando Fransisca
16.00 Herensia:	Kaminata Historiko di Rincon
17.00 Aki Boneiru:	Uchi i Balentin 50 aña kasa
18.00 Herensia Korsou:	Catalina (Kata) Antonia-Lucia
19.00 BAPA:	Nando ku Carlos Domacassé
20.00 Herensia:	Ines Maria Martis-Thodé
21.00 Aki Boneiru:	Jandino Asporaat
22.00 Herensia:	Ka'i Mamai na Bonaire 2
23.00 BAPA:	Mariette Oosterhoff

Tur mèrdia 12'or ta kuminsá un programashon nobo di 4 ora.

E programashon aki ta ritipí pa 24:00.



E PRESENSIA DI DIOS DEN ATVERSIDAT

Skritura: Salmo 94:14-23

"Pasobra SEÑOR no ta bandoná Su pueblo, ni E no ta bai laga Su erensia." vs14(BS)

Mi tin sigur ku bo a yega di sinti bo bandoná, pèrdí, trais-honá, desepshoná i mas. Den momentonan asina nos tur tin mester di un amigu ku ta buska nos drechi, ku ta ei ku nos den e pos di nos desesperashon.

Un señora tabata manda tur su sèn, ku e tabata traha duru p'e, den ekterior pa su famia. E intenshon tabata ku nan lo a traha su kas p'e, pa un dia den su behes, e por regresá su pais i asina disfrutá di su kas. Un dia e señora a haña sa ku su famia mes a hòrt'é di su sèn. E señora a bira kasi loko i tabata ke a kaba ku su bida. E tabata sintié traishoná pa su mes famia.

Kisas bo situashon ta diferente ku e señora akí, pero den bo situashon bo ta sinti ku no tin ningun hende ta preokupá pa bo di bèrdat. Bo ta sinti bo usá, bandoná, deprimí i desepshoná, kansá, den soledat i traishoná.

No tin un persona ku ta preokupá mas tantu pa bo ku Hesus. Sa ku SEÑOR lo bringa pa bo i abo lo keda ketu (Eksodo 14:14).

Dios ta stima bo, E nunca lo bandoná bo ni traishoná bo. I no importá kon skur bo situashon ta parse, Dios ta bo Defensa, Baranka i Refugio. Bo por konta ku Su presensia.

"Ma SEÑOR tabata mi defensa, i mi Dios e baranka di mi refugio." Salmo 94:22

Jackeline Hooi-Paula
Produkshon PGM

Partisipashon

Pèrmit di konstrukshon

Entre mart 2023 te ku mei 2023 nos a risibí e petishonnan menshoná aki bou pa un pèrmit di konstrukshon. Kolegio Ehekutivo di Entidat Públiko Boneiru ta anunsia esakinan a base di artíkulo 2.8 insiso 3 di e Lei di Biblienda Públiko, Ordenamentu Teritorial i Maneho di Medio Ambiente.



Number di e kaso	Fecha di e petishon	Petishon pa permit	Tipo di konstrukshon	Informashon di e parsela	Bario	Kaya i number di kas
Z/23/005693	28-feb-23	Konstruí	Drie woonhuizen onder een kap	4-H-899	Belnem	
Z/23/005739	01-mrt-23	Konstruí	Zes woonhuizen onder een kap	4-G-3820	Nikiboko	Sonrisa di Lac 14
Z/23/005740	01-mrt-23	Konstruí	Vier woonhuizen onder een kap	4-G-3869	Nikiboko	Sonrisa di Lac 3
Z/23/005741	01-mrt-23	Konstruí	Vier woonhuizen onder een kap	4-G-3879 4-G 3880	Nikiboko	Sonrisa di Lac 23+25
Z/23/005750	02-mrt-23	Ekspanshon	Bestaande woonhuis	4-F-24	Belnem	EEG Boulevard 59
Z/23/005756	02-mrt-23	Konstruí	Drie woonhuizen onder een kap	4-H-688	Belnem	
Z/23/005760	02-mrt-23	Konstruí	Twee woonhuizen onder een kap	4-G-1136	Nikiboko	
Z/23/005845	07-mrt-23	Konstruí	Woonhuis	4-G-2860	Tera Kora	
Z/23/005846	07-mrt-23	Konstruí	Woonhuis	4-G-3847	Nikiboko	Sonrisa di Lac 68
Z/23/005847	07-mrt-23	Konstruí	Appartementen complex bestaande uit 16 unit met zwembad en 16 berghok	4-H-897	Belnem	
Z/23/005880	08-mrt-23	Ekspanshon	Bestaande woonhuis tot twee woonhuizen onder een kap	4-E-3944	Antriol	
Z/23/005907	08-mrt-23	Konstruí	Woonhuis met zwembad	4-G-267	Nikiboko	Kaya Dominico Hererra
Z/23/005934	10-mrt-23	Konstruí	Woonhuis	2-G-120	Tra'i Montana	
Z/23/005936	10-mrt-23	Ekspanshon	Bestaande woonhuis tot twee woonhuizen onder een kap met zwembad	4-D-3159	Hato	
Z/23/006028	15-mrt-23	Konstruí	Tweede woonhuis	4-D-2500	Antriol	
Z/23/006030	15-mrt-23	Konstruí	Twee woonhuizen onder een kap	4-E-4059	Antriol	
Z/23/006031	15-mrt-23	Ekspanshon	Bestaande woonhuis met 4 slaapkamers en 5 badkamers	4-E-3555	Antriol	
Z/23/006033	15-mrt-23	Konstruí	Woonhuis, bijgebouw en zwembad	4-B-421	Weg naar Rincon	
Z/23/006034	15-mrt-23	Konstruí	Twee woonhuizen en twee zwembaden	4-B-422	Weg naar Rincon	
Z/23/006035	15-mrt-23	Konstruí	Garage	4-E-3470	Antriol	
Z/23/006036	15-mrt-23	Konstruí	Berghok	4-G-3603	Nikiboko	
Z/23/006037	15-mrt-23	Konstruí	Woonhuis met zwembad	4-A-2739	Montaña	
Z/23/006038	15-mrt-23	Konstruí	Zwembad en renoveren van pier dek	4-F-1138	Kralendijk/Playa	J.A. Abraham Boulevard 104
Z/23/006071	16-mrt-23	Konstruí	Appartement	4-G-4088	Tera Kora	Kaya Valdivia
Z/23/006155	21-mrt-23	Konstruí	Loods	4-G-2906	Tera Kora	
Z/23/006204	23-mrt-23	Rekonstruí	Pier	4-F-549	Belnem	
Z/23/006205	23-mrt-23	Konstruí	Een woonhuis, Twee woonhuizen onder een kap incl. zwembad, Drie woonhuizen onder een kap incl. zwembad	4-B-352	Weg naar Rincon	
Z/23/006206	23-mrt-23	Konstruí	Twee woonhuizen onder een kap	4-D-3619	Antriol	
Z/23/006207	23-mrt-23	Konstruí	Twee woonhuizen onder een kap	4-D-3620	Antriol	
Z/23/006208	23-mrt-23	Konstruí	Tweede woonhuis	4-E-1296	Antriol	
Z/23/006248	24-mrt-23	Ekspanshon	Bestaande woonhuis met carport en berging	4-H-506	Lima	
Z/23/006266	27-mrt-23	Konstruí	Vijf appartementen	4-G-2569	Nikiboko	
Z/23/006269	27-mrt-23	Konstruí	Woonhuis	2-B-81	Rincon	
Z/23/006271	27-mrt-23	Konstruí	Woonhuis	4-G-2752	Nikiboko	
Z/23/006273	27-mrt-23	Konstruí en Ekspanshon	Kantoor/Appartementen	4-D-372	Playa	
Z/23/006275	27-mrt-23	Konstruí	Zwembad	4-D-2204	Playa pabou	
Z/23/006288	27-mrt-23	Konstruí	Woonhuis	4-D-3582	Antriol	
Z/23/006290	27-mrt-23	Konstruí	Woonhuis	4-D-3583	Antriol	638
Z/23/006291	27-mrt-23	Konstruí	Woonhuis	4-D-3584	Antriol	
Z/23/006293	27-mrt-23	Konstruí	Woonhuis	4-D-3585	Antriol	515
Z/23/006295	27-mrt-23	Konstruí	Woonhuis	4-D-3586	Antriol	
Z/23/006296	27-mrt-23	Konstruí	Woonhuis	4-D-3587	Antriol	
Z/23/006298	27-mrt-23	Konstruí	Vier appartementen onder een kap 4-D-3588	Antriol		528
Z/23/006346	30-mrt-23	Konstruí	Woonhuis	4-D-3600	Antriol	
Z/23/006348	30-mrt-23	Konstruí	Woonhuis	4-D-3601	Antriol	
Z/23/006349	30-mrt-23	Konstruí	Woonhuis	4-D-3602	Antriol	
Z/23/006350	30-mrt-23	Konstruí	Woonhuis	4-D-3603	Antriol	
Z/23/006351	30-mrt-23	Konstruí	Woonhuis	4-D-3604	Antriol	
Z/23/006352	30-mrt-23	Konstruí	Woonhuis	4-D-3605	Antriol	
Z/23/006372	31-mrt-23	Konstruí	Palapa en zwembad	4-A-1682	Hato	
Z/23/006373	31-mrt-23	Ekspanshon	Bestaande woonhuis tot drie woonhuizen onder een kap	4-E-2539	Antriol	
Z/23/006489	11-apr-23	Konstruí	Woonhuis	4-E-2179	Antriol	
Z/23/006490	11-apr-23	Konstruí	Drie woonhuizen onder een kap met zwembad	4-G-3928	Nikiboko	Vista Royale Village 29
Z/23/006491	11-apr-23	Konstruí	Woonhuis met zwembad	4-H-841	Lima	

Z/23/006504	11-apr-23	Konstruí	Woonhuis	4-G-4078	Tera Kora	
Z/23/006508	11-apr-23	Konstruí	Plaatsen v/e aluminium trap, lamp aan rots en vloer storten	4-H-32	Belnem	
Z/23/006509	11-apr-23	Konstruí	Twee woonhuizen onder een kap	4-E-3590	Antriol	
Z/23/006510	11-apr-23	Konstruí	Twee woonhuizen onder een kap	4-B-358	Weg naar Rincon	Bona Bista A16
Z/23/006511	11-apr-23	Konstruí	Zwembad	4-G-3847	Nikiboko	Sonrisa di Lac 68
Z/23/006512	11-apr-23	Ekspanshon	Bestaande app. tot drie woonhuizen onder een kap	4-G-1117	Tera Kora	
Z/23/006514	11-apr-23	Ekspanshon	Bestaande appartementen met penthouse	4-H-649	Belnem	
Z/23/006515	11-apr-23	Konstruí	Snackbar - afhaalcenter	2-C-3	Rincon	
Z/23/006522	12-apr-23	Konstruí	Tweede woonhuis en berging	4-E-3066	Lagoen Hill	
Z/23/006523	12-apr-23	Konstruí	Woonhuis	4-D-3001	Hato	
Z/23/006526	12-apr-23	Konstruí	Woonhuis, carport met zwembad	4-B-380	Seru grandi	
Z/23/007681	14-apr-23	Konstruí	Tweede woonhuis	4-E-1201	Antriol	
Z/23/006649	19-apr-23	Konstruí	Woonhuis	4-G-3905	Nikiboko	
Z/23/006650	19-apr-23	Konstruí	Acht appartementen	4-D-3018	Sabana	
Z/23/006651	19-apr-23	Konstruí	Drie blok van appartementen van 9 unit	4-G-310	Nikiboko	
Z/23/006644	19-apr-23	Konstruí	Woonhuis met zwembad	4-H-471	Lima	La Palma 25
Z/23/006701	24-apr-23	Konstruí	Basisschool	Domeingrond	Antriol	
Z/23/006707	24-apr-23	Ekspanshon	Bestaande trafohuis	4-E-3585	Antriol	
Z/23/006708	24-apr-23	Konstruí	Twee woonhuizen onder een kap	4-G-1248	Nikiboko	Kaya Sinfonia 4
Z/23/006720	24-apr-23	Konstruí	Woonhuis met zwembad	4-B-407	Weg naar Rincon	
Z/23/006765	26-apr-23	Konstruí en Ekspanshon	Nieuwe woonhuis en Uitbreiding bestaande woonhuis tot twee onder een kap	4-G-2034	Tera Kora	
Z/23/006782	28-apr-23	Konstruí	Woonhuis	4-A-2706	Hato	
Z/23/006783	28-apr-23	Konstruí	Tweede woonhuis	4-E-2074	Antriol	
Z/23/006785	28-apr-23	Derumbá	Bestaande gebouwen	4-D-560, 561, 562, 563, 564	Kralendijk/Playa	
Z/23/006803	02-mei-23	Ekspanshon	Bestaande woonhuis met veranda/zwembad en berging	4-A-2025	Nawatie	
Z/23/006841	04-mei-23	Konstruí	Woonhuis	4-B-167	Luga Alehá	Luga Alehá 29
Z/23/006842	04-mei-23	Ekspanshon	Bestaande woonhuis tot twee woonhuizen onder een kap	4-G-500	Nikiboko	
Z/23/006843	04-mei-23	Ekspanshon	Entree/hal luchthaven Flamingo met een overkapping	4-F-487	Airport	
Z/23/006848	05-mei-23	Konstruí	Bouwen van twee woonhuizen onder een kap met zwembad	4-E-4087	Lagoen	
Z/23/006869	08-mei-23	Konstruí	Garage, gazebo incl. toilet	4-A-1662	Santa Barbara	
Z/23/006879	08-mei-23	Konstruí	Woonhuis	4-G-3835	Nikiboko	Sonrisa Lac 44
Z/23/006893	09-mei-23	Konstruí	Woonhuis	4-G-3379	Nikiboko	
Z/23/006894	09-mei-23	Konstruí	Woonhuis	4-G-3969	Nikiboko	
Z/23/006906	09-mei-23	Konstruí	Woonhuis	4-E-3857	Nikiboko	
Z/23/006907	09-mei-23	Ekspanshon	Bestaande woonhuis met slaapkamer	4-E-3102	Nikiboko	Kaya Mofi 6
Z/23/007549	11-mei-23	Konstruí	Appartementen	4-E-3294	Antriol	Kaya Carmen 19
Z/23/007032	17-mei-23	Konstruí	Loods	4-E-1439	Nikiboko	Kaminda Jato Baco 55
Z/23/007033	17-mei-23	Konstruí	Woonhuis	4-G-3301	Nikiboko	
Z/23/007035	17-mei-23	Konstruí	Houten woonhuis	5-A-54	Lagun	
Z/23/007055	17-mei-23	Ekspanshon	Bestaande woonhuis	4-E-1065	Amboina	
Z/23/007059	17-mei-23	Konstruí	Tweede woonhuis	4-D-2507	Antriol	
Z/23/007060	17-mei-23	Konstruí	Woonhuis met zwembad	4-A-2291	Santa Barbara	
Z/23/007061	17-mei-23	Konstruí	Twee blok appartementen bestaande uit 8 unit	4-E-1604	Antriol	
Z/23/007062	17-mei-23	Ekspanshon	Bestaande woonhuis	4-D-3498	Noord Saliña	
Z/23/007063	17-mei-23	Konstruí	Twee appartementen van één slaapkamer onder een kap	4-E-2256	Antriol	
Z/23/007159	24-mei-23	Konstruí	Woonhuis, zwembad, garage en losstaande gebouw	4-A-1642	Nawatie	Kaya Plata 21
Z/23/007160	24-mei-23	Konstruí	Woonhuis	4-G-3983	Nikiboko	Vista Royal Village kavel 89
Z/23/007163	24-mei-23	Konstruí	Woonhuis met zwembad	4-G-3926	Nikiboko	
Z/23/007168	25-mei-23	Konstruí	Substation voor de Airport Runway lights	4-F-487	Tera Kora	Plaza Medardo S.V. Thielman
Z/23/007177	25-mei-23	Konstruí	Plaatsen en ombouwen v/e zeecontainer tot tijdelijke kantoor	4-D-1932	Hato	Kaya Amsterdam
Z/23/007588	31-mei-23	Ekspanshon	Bestaande Trafohuis	4-F-867	Tera Kora	Kaya International z/n
Z/23/007643	31-mei-23	Konstruí	Twee woonhuizen onder een kap	2-C-257	Rincon	Kaya Kaña 27
Z/23/007662	31-mei-23	Rekonstruí	Bestaande bergplaats tot ATM	4-E-46	Antriol	Kaya Korona

Bo ke tira bista den un pèrmit?

Via e anunsio ofisial aki nos ke informá tur hende tokante e petishonnan ku a keda entregá pa un pèrmit di konstrukshon. Bo ta un interesado direkto i e pèrmit di konstrukshon tin konsekuensia pa bo? E ora ei dentro di dos siman despues di publikashon di e aviso aki bo por manda un email pa traha un sita pa tira un bista den e pèrmit i entregá bo punto di bista.

Mail Direktorado di Planifikashon i Desaroyo / departamento di realisashon / unidat di pèrmit di konstrukshon via directie_ro@bonairegov.com pa traha un sita.

Direktor di Direktorado di Planifikashon i Desaroyo
Ing. Marlon Martina, MBA

Bo no ta di akuerdo ku e desishon definitivo?

Ta inklui bo punto di bista na momentu di tuma un desishon. A base di e Lei di Hurisdikshon Administrativo BES bo por hasi opheshon si bo no ta di akuerdo ku e desishon definitivo di Entidat Públiko Boneiru. Bo por hasi esaki dentro di 6 siman despues di e fecha riba kua a duna e desishon definitivo.

Bo por entregá opheshon por eskrito na Kolegio Ehekutivo via postenarchief@bonairegov.com. Bo por bai den apelashon tambe dentro di 6 siman na korte (Korte di Promé Instante).



Ombudsman: “Pero ainda no tur kos ta solushoná”

Mehorashon den situashon di studiantenan Karibense

KRALENDIJK – Ombudsman Nashonal Reinier van Zutphen ta mira mehorashon den e situashon di studiantenan Karibense ku ta bai Hulanda pa studia. Despues di añanan largu ku a pidi pa e problemanan ku e studiantenan ta konfrontá, djárasen a sali su reportahe final.

Na 2020 van Zutphen a hasi un investigashon na e problemanan ku studiantenan for di e parti Karibense ta konfrontá momentu ku nan bai studia na Hulanda. El a konstatá ku e suministrashon di informashon i guia pa e studiantenan tabata malu. Tambe promé ku nan salida pa Hulanda, nan no ta haña

number di servisio di siudadania, BSN. Sin BSN por ehèmpel nan no por habri un kuenta di banko.

Banda di esei, apesar ku nan pasport Hulandes, nan no por hasi uso di un seguro básiko di kuido Hulandes. Dor di esei nan no tabatin na remarke pa kompensashon di kuido. Studiantenan tabata pensa ku na Hulanda sí nan por bini na remarke i tòg tabata pidi e kompensashon. Dor di esaki despues nan tabata kai den problema finansiero, pasobra nan mester paga e kompensashon bèk.

Finalmente Ombudsman ta mira ku tabatin problema durante e pago

bèk di debe di estudio despues di regreso na nan isla. Esaki ta sòru pa retornan finansiero grandi pa studiantenan Karibense.

Den e rapòrt ‘Kopzorgen van Caribisch Studenten’, Ombudsman a hasi un kantidat di rekomendashon. Pa evitá ku su rapòrt ta resultá den lachi, e ta aktivo ta monitòr i mehorashonnan nesesario.

Van Zutphen: “Studiantenan for di e parti Karibense di Reino, ta konfrontá tur tipo di problema kompará ku studiantenan ku a nase na Hulanda. Esaki no ta hustu i malu. Pues huntu ku mi kolegan mi a hasi esfuerso pa sòru pa solushoná e problemanan di e studiantenan Karibense mas pronto posibel.”

Ombudsman a pidi atenshon bou di e otro ministerionan pa tuma akshon, publikando reportahenan di adelanto, buska kontakto ku otro partidonan di interes i organisá enkuentronan di mesa rondó. Tin bon mehorashon, pero tin falta ainda di puntonan di atenshon. Van Zutphen: “Tin mihó informashon i guia pa studiantenan Karibense. Banda di esei ta mira kon studiantenan Karibense na momentu di petishon di finansiamentu di estudio via DUO direktamente por haña un BSN. Esaki mi ta haña hopi bon i bunita paso. Di otro banda tin sí atrobe ku no ta regla esaki bon pa e studiantenan pa e próksimo aña di estudio 2023-2024. Esaki mi ta haña lástima i

desepshonante. Banda di esei mi ta mira ku studiantenan tin mester di ayudo na momentu di haña akomodashon i inskripsion na tempu den e BRP di munisipionan. Tambe nan tin mester di mas ayudo serka di e regulashon i leinan kompleho na Hulanda. Ketu bai mi ta mira tambe problema ku pago di debe di estudio na momentu di regreso na e islanan. Huntu nos mester keda atendé i pues no laga esakinan drumi.”

E último añanan, segun Ombudsman, a pone un base fuerte. E bon partidonan sa di haña otro i e enkargo ta kla. E ta sigui e desaroyonan di aserka i ta keda na disposishon di studiantenan Karibense ku ke entregá un keho.



EDITORIAL MESTER SIÑA BIBA KU NOS!

Basta komentario i reakshon riba e editorial ku BONERIANO a publiká e siman aki, kuestionando loke ta pasando na Akseeso, e instansia ku a bini pa pone bou di un dak tur e servisionan ku tabata enkargá na nivel lokal ku asuntunan sosial. Nos ta kere ku tabata un bon desishon. Pero no a dura masha ku a surgi problema, te asta ku a kore ku e direktor Henry Breedveld.

Di mes, manera ta e kaso ku kasi tur loke ta pasa òf no pasa riba e isla aki, ta bira problema. BONERIANO a analisá e asuntu aki na su manera i nòmber di eks-diputado Nina den Heyer a kai. E no por a keda sin kai, mirando e aspekto di konflikto di interes ku ta bini dilanti den e asuntu aki.

Nos a kuestioná e asuntu aki den forma skèrpi i di mes, na momentu ku bo kinipí dje forma aki, ta bini reakshon. Un par di hende, sin duda aktuando bou di instrukshon, a bolbe purba di mata e mensahero, sin tuma nota di e mensahe.

Nos por ta kòrtiku den e asuntu aki. BONERIANO ta sigui i analisá situashonnan den komunidad na un manera krítiko, pero desente, sin ataká niun hende personal, pero sí e echonan. I nos lo sigui hasié, sea gusta òf no gusta. Esnan ku no gusta, ta liber pa reakshoná.

Un medio di komunikashon mester ta un kachó di warda den un komunidad. No por tin espasio pa komplasé hende, pasobra nan kara por ta parse inosente i desente. Nos no ta partisipá den e weganan aki. Mester siña biba ku nos!

BONHATA ta boga pa

Turismo krusero i hospedahe traha huntu

KRALENDIJK — “Mi a komprondé ku tin aparentemente un konflikto entre turistanan di hotèl i esnan krusero. E no a pasa mi dilanti.

Di otro banda mi sa di operadónan di tour ku ta traha huntu ku hotèlnan i ta ofresé turistanan un ‘daypass’. Esei ta loke BONHATA ta para p’e, pa tur envolví traha huntu.”

Asina direktor di BONHATA, Veroesjka de

Windt a duna di konosé na Boi Antoin den e programa Aktualidat na Bonaire.tv.

Entretamentu lokal na hotèlnan ta un tema ku tin atenshon di BONHATA. Segun e direktor un di e gritunan di hotèlnan ta ku praktikamente no tin tantu grupo folklórico manera ántes.

“Si tin mas grupo ku kisas BONHATA ku ta aktivo, laga BONHATA sa pa asina nos por informá nos

miembronan.”

E direktor ta enfatisá ku meta pa futuro ta keda sali na interes di miembronan i turismo na Bonaire. Tambe e direktor ta deseá pa e organisashon sigui krese i traha huntu ku tur envolví den e sektor.

Huntu ku Tourism Corporation Bonaire, TCB, intenshon ta pa traha riba turismo sostenibel i fuerte.



Barku grandi di Disney den bahia di Kralendijk djamars.

Kaminata històriko Rincon den Herensia

KRALENDIJK – Pa algun aña kaba dos persona di Rincon, Japi Oleana i Nel Janga, ta organisando riba dia promé di mei un

kaminata històriko den nan bario. Nan ta lanta tempran pa realisá e kaminata aki. Na e último okashon Franklin Crestian (80) tam-

be a djòin e grupo. E ekipo di FuHiKuBo kasi for di kuminsamentu ta hasi grabashon di e kaminata aki, durante kua ta

konta di habitantenan di e kasnan riba ruta. E biá aki a skohe un ruta ku a sali for di busto di Julio Abraham pa bai direkshon nort, na unda tin awendia e bario di kas di pueblo Sofaya, ku ta relatá ta un señora ku a biba tambe ei banda

Banda di pasa banda di diferente kas, e grupo guiá pa Oleana, Janga i Crestian a pasa tambe banda

di e santananan protestant i evangelista.

Misa evangelista, Tanki Bentura i Roi di Dada, djs pa menshoná algun ehèmpel.

E programa ku FuHiKuBo a produsí dje kaminatan històriko aki ta pasando e siman aki na Bonaire.tv.

Awe djaweps e ta pasa pa 4'or di atardi i mañan pa 8'or di anochi.



Hendenan ta opta pa traha den otro sektor

Difísil pa haña hende pa traha den turismo

KRALENDIJK – Ta difísil pa haña hende pa traha den sektor di turismo. Direktor di BONHATA, Veroesjka de Windt, a konfirmá esaki. Presentadó fi e programa Aktualidat na Bonaire.tv, Bòi Antoin, a trese e ponensia dilanti ku hendenan lokal no ke traha den turismo, apesar ku èks diputado Nina den Heye a yega di duna e oportunidat pa hendenan lokal solisitá na momentu ku Hotèl Chogogo tabata bai habri su porta.

“Boneiru su porsentahe di desempleo ta hopi abou i hendenan ta skohe pa laborá den otro sektor. Esaki ta di lamentá mirando ku aktualmente gran mayoria

ta latinonan ta laborá den turismo. Nos ta promoviendo si ketu bai pa hendenan lokal traha den e sektor,” de Windt ta splika.

Na dos okashon BONHATA a organisá un ‘speed meet’, loke mester a trese e buskadó i dunando di trabou huntu. Esaki no a duna e resultado kompletamente deseá. “Tin algun miembro ku a logra reklutá trahadó i otro no. Tin dos kos ta hunga un ròl. E echo ku sifranan ta musta ku no tin hopi hende sin trabou i tambe kisas e parti di promoshon ku kisas mester bai otro.”

Banda di esaki BONAHATA ta bai skolnan i duna informashon tokante e sektor.



PCN

PENSIOENFONDS
CARIBISCH NEDERLAND

www.pensioenfonds-cn.com

VACATURE MANAGER PCN | BONAIRE

Pensioenfonds Caribisch Nederland is op zoek naar een manager voor haar uitvoeringsorganisatie. De uitvoeringsorganisatie verzorgt de pensioenadministratie, de financiële administratie en de verslaglegging voor de pensioenen van de sectoren Overheid, Zorg en Onderwijs in Caribisch Nederland.

Als manager ben jij verantwoordelijk voor een excellente pensioenuitvoering. Je motiveert medewerkers en daagt hen uit om samen de doelstellingen te realiseren. Je zorgt voor verbinding en een goede werksfeer. Je bent een sterke leider en beschikt over relevante inhoudelijke expertise. Je hebt een financiële achtergrond en ervaring met financiële verslaglegging.

In de rol van manager stuur je de medewerkers aan. Daarnaast ben je verantwoordelijk voor het opstellen van de begroting, het financieel jaarverslag, de operationele rapportages en de beleggingsrapportages. Je zorgt ervoor dat de rapportages tijdig en juist worden ingediend bij De Nederlandsche Bank.

Je bent namens de uitvoeringsorganisatie het aanspreekpunt voor het bestuursbureau en het bestuur.

Wat wij vragen:

- Je hebt een afgeronde HBO/WO opleiding (bij voorkeur op financieel administratief gebied).
- Je beschikt over ruime ervaring in leidinggeven.
- Je bent in staat mensen te verbinden en een goede werksfeer te creëren.
- Je hebt ervaring met financiële administratie en verslaglegging.
- Je hebt een hands-on mentaliteit, bent oplossingsgericht en beschikt over een goed analytisch inzicht.
- Je hebt een goede beheersing van de Nederlandse taal (zowel schriftelijk als mondeling) en spreekt bij voorkeur ook Papiaments.
- Kennis van pensioenen en pensioenuitvoering is een pré.

Wat wij bieden:

- Een ambitieuze organisatie met leuke, enthousiaste collega's.
- Een professionele werkomgeving op ons kantoor op Bonaire.
- Marktconforme arbeidsvoorwaarden.
- Brede opleidingsmogelijkheden.

PCN is opgericht in 2010 voor de pensioenen van ambtenaren, medewerkers in de zorg en in het onderwijs. PCN heeft een kantoor op Bonaire en één medewerker op Sint Eustatius. Bij PCN werken circa 10 medewerkers die de pensioenen verzorgen voor meer dan 7000 deelnemers.

De volledige functiebeschrijving vind je op onze website www.pensioenfonds-cn.com. Hier vind je ook meer informatie over PCN.

Interesse?

Stuur je sollicitatie en CV naar margo.lieveld@montaepartners.nl. Voor vragen over de functie en de procedure kun je contact opnemen met Margo Lelieveld via bovenstaand e-mailadres of op telefoonnummer +31 6 30 28 22 13.

Segundo grupo a sigui kurso avansá di historia

KRALENDIJK – Un grupo di alrededor 20 persona a risibí djamars último nan sertifikado komo prueba di a sigui e kurso avansá di historia i kultura serka FuHiKuBo. Tabata di dos biá ku a

duna e kurso aki, den kua ta atendé tópikonan nobo i alabes bai mas profundo den tópikonan atendé den e kurso básiko.

Dosente di e kurso Bòi Antoin a bisa ku el a keda bou di impreshon di





OPTENIBEL NA



Kuranderia popular

Natural i spiritual

Un proyekto di Unesco i FuHiKuBo

Ofisina di
FuHiKuBo

Ofisina di Extra

Del Mar BV



\$17,50

e grupo aki, ku a kumpli ku práktikamente tur lès. Loke a hala atenshon tabata tambe algun hóben entusiasma. For di e grupo aki, tambe esun anterior, a resaltá dos partisipante hóben ku FuHiKuBo ta duna oportunidat pa sigui

bai mas profundo den historia, kultura i naturalesa ku proyektonan komersial. Entre e partisipantenan tabatin tambe sindikalista Cherele Kwidama, ku ta demonstrá hopi interes den kultura.



Sekretariado di CBP BES ta honra sra. Esther Pourier-Thodé

KRALENDIJK -- Sekretariado di Komishon pa Supervishon i Protekshon di Dato Personal BES (CBP BES) ta logra un meta importante den su desaroyo. Despues di un komienso modesto na 2014, awor e sekretariado tin su propio ofisina.

Na 2014, e sekretariado a establese den e edifisio anterior di APNA, awor konosí komo edifisio di RCN SSO, ku un kamber i un empleado dediká na protekshon di dato personal pa Boneiru, Sint Eustatius i Saba. Na 2017, e sekretariado a muda pa Kaya Alm. P. L. Brion (e edifisio anterior di IND), na unda el a kompartí espasio di ofisina ku Outoridat di Konsumidó i Merkado (ACM), ku a brinda oportunidat nobo i a fortifiká kolaborashon den organisashon di supervishon. Despues di vários esfuerso pa buska

otro ofisina pa brinda servisio, finalmente CBP BES ta konta ku su propio ofisina. E sekretariado ta prepará pa brinda sosten na siudadano i organisashon ku tin pregunta tokante prosesamentu di dato personal i lo sigui intensifiká su tarea di supervishon for di un lokalidat nobo.

Durante apertura di e ofisina nobo, na honor di sra. Esther Pourier-Thodé, ku a bai nos dilanti na mei último, a inougurá e sala di reunion di e sekretariado bou di e nòmber "sala di reunion Esther Pourier-Thodé". Sra. Esther Pourier-Thodé tabata visepresidente di CBP BES for di inisio i tabata e forsa trankil den e organisashon i tabatin un responsabilidat spesial pa maneho di empresa, partikularmente asuntu di personal.

"Awe nos ta honra e kontribushon di Esther Pourier-Thodé na nos komishon

dor di pone su nòmber na e sala di reunion. Esther tabata un miembro i visepresidente hopi apresiá i visepresidente ku a yuda nos komo komishon pa tene kuenta ku hende i e derechonan fundamental di individuo. E nòmber di e sala di reunion ta pa mantené su kontribushon bibu i pa mantené su perspektiva duradero durante eksistensia di nos komishon", asina presidente sr. Glenn Thodé a ekspresá.

Su kontribushon i personalidat balioso tabata di gran balor pa e komishon i e sekretariado. Ku e nòmber na e sala di reunion, nos ta mantené e rekuerdo di Esther semper ku nos.

Organisashon i siudadano por bishitá nos ku un sita. E lokalidat nobo ta na Kaya Industria 15E. Sekretariado ta alkansabel tambe via info@cb-pbes.com i 715-9114.



Boneiru ta selebrá Dia Internashonal di Buseo pa Hende Muhé

KRALENDIJK – Dia 15 di yùli Tourism Corporation Bonaire (TCB) den kolaborashon ku e ‘content creator’ hulandes Kiki Multem i un di e tòp 3 plataformanan di biahe online mas grandi di Hulanda Reishonger.nl, a selebrá Dia Internashonal di Buseo pa Hende Muhé en buska di aventura bou di awa.

Na luna di mei di e aña akí Kiki Multem tabata wéspet di Toucan Diving na Plaza Beach Resort pa optené su sertifikashon di PADI Open Water. Kiki a skirbi den un blòg tokante su biahe di sertifikashon i su eksperensianan ku dia

15 di yùli 2023 a keda publiká riba BonaireIsland.com i riba su propio blòg online KikiMultem.com ku tur luna tin un alkanse di mas ku 25.000 bishitante. E mensahe nobo di blòg a haña sosten tambe di un pòst spesial riba su Instagram @KikiMultem i riba @BonaireIsland.

Lindsey van Loon, ku aktualmente ta kedando na Boneiru pa un bishita individual ku ta REGARDÁ medianan di komunikashon, a krea un ‘content’ spesial di buseo pa e plataforma di biahe online mas grandi di Hulanda, Reishonger.nl. Riba Dia Internashonal

di Buseo pa Hende Muhé, Lindsey a bai Klein Bonaire ku Buddy Dive Resort i un grupo di hende muhé sambuyadó, kaminda el a partisipá na algun aktivitat pa rekuperashon di ref di koral.

El a skirbi tokante su eksperensianan riba Reishonger’s Instagram stories @Reishonger, i tambe riba @BonaireIsland. Casper Douma a saka e potrètnan i a traha e videonan.

Ku e formanan di kolaborashon akí TCB ta spera di enkurashá mas partisipashon di hende muhé na sambuyamentu na Boneiru i na otro partinan di mundu.



Veroesjka de Windt (BONHATA):

Impuesto di turista no a afektá turismo

KRALENDIJK— Impuesto di entrada ta un echo i tin hende ku no tin problema kuné i otro si. Pero generalmente el a keda aseptá pa turistanan ku ta bini Boneiru. E no a afektá turismo di e isla. “Meskos ku tur otro kos, mi ta kere mester duna hendenan tempu pa kustumá kuné”, direktor di BONHATA Veroesjka de Windt a bisa durante un entrevista na Bonaire.tv.

Praktikamente na tur parti di mundu ta kobra e impuesto. Loke segun de Windt ta diferente na Boneiru, t’e echo ku ta kobra esaki na momentu ku un turista drenta Boneiru.

Atministrativamente

e kobransa delantá ta benefisiá miembronan di BONHATA i tambe e turista ku no mester kòrda riba esaki despues di su vakashon.

Kontestando pregunta di e presentadó, Boi Antoin, ku si introdukshon di e impuesto a kousa bahada di bishitante, De Windt ta splika ku esaki no tabata e kaso.

Un otro desaroyo ku a para ketu na dje den e programa ta e kantidat di restaurant ku ta habriendo. Segun de Windt, esaki ta kuadra debí ku ta promoviendo Boneiru komo kapital kulinario den region.

De Windt: “Kapital kulinario ta nifiká ku nos ta ofresé na Boneiru restaurantnan di nivel haltu ku ta ofresé platonan interesante.

Aparte di esei e variashon di diferente tipo di kuminda, banda esun lokal, ta duna e turista oportunidat di purba diferente plato riba nos isla.”



NOS FAMIANAN BONERIANO

(24)

Investigashon: drs. John Schermer

Kompilashon: Boi Antoin



Ta importante i interesante pa sa di unda nos a bini. Ken tabata nos antepasadonan? Den un seri di artíkulo BONERIANO ta iluminá orígen di famianan boneriano, basá riba un estudio hasí pa drs. John Schermer durante e periodo di 1993 te 2006. Despues el a pone resultado di su investigashon riba e wèpsait www.bonairefamily.com

Bonairefamily.com

Ta bon pa asentuá ku e wèpsait ta un programa den kòmputer ku ta identifiká tur persona i nan famia di Boneiru entre aña 1700 pa aña 1900 ku nan fecha di nasementu, kasamentu i òf fayasimentu. A usa mas dokumentu manera inventarionan ku lista di katibu, relato anual di komandùnan i tambe relato diario i otro korespondensia pa por a interpretá e datonan aki. Komo ku e 'site' no ta bai mas leu ku aña 1900 mi ke sugerí esnan interesá pa bishitá website wiewaswie.nl ku sí tin datonan despues di aña 1900. E 'site' bonairefamily.com ta repartí nos historia den diferente époka. 1700 te 1800 tempu di West Indische Compagnie (WIC). 1800 te 1863 tempu di katibu di rei i katibu di shon. 1800 te 1900 tempu di hende liber.

Laga nos sigui e famia Pourier den kurso di e tempunan aki.

Kòrsou aña 1703

Dia 7 di mart 1703 Olivier Pourier ta na waf na Kòrsou sperando yegada di barkunan ku katibu for di Afrika. Na e waf tin algun otro kurasoleño, manera Jan Martijn, Jan Ellis, Dirk de Groot, kende no a bini pa kumindá e pasaheronan, psino pa kumpra un òf mas katibu pa sirbi na kas, komo 'huisslaaf'.

E dia aki ta yega Kòrsou for di Angola e barku di WIC ku yama 'Duynenburg' ku un embarkashon di 538 katibu. Propiedat manera plantashi, kas, krio di bestia (ganado), asta katibu tabata mas importante ku warda plaka na banko. Tur momentu por a bende nan pa haña kapital. Ya kaba Pouriernan tabata miembro di e poblashon ku tabata konsistí di kolonista-

nan oropeo di diferente famia hudiu.

Aruba 1790 – 1792

Jacobus Pellicorne Poryere (Pourier?) ta komandùr na Aruba. Poblashon di Aruba ta konsistí pa mayor parti di indjan, famia di kolonista i algun famia interesante pa Boneiru, ku tabata Semeleer, Boekhoudt, Kock, personanan ku un tempu tabata den sirbishi di WIC i ku tabata stashoná komo 'faktoer' òf 'kapitein van de indianen' na Boneiru.

Boneiru aña 1800

Pierre Paula Porier ta nase na Boneiru. Nos no tin su akta di nasementu, pero sí un akta di 1858, dia el a kasa ku Francisca Leonora Sint Jago. Famia Sint Jago ta un famia krioyo di Kòrsou.

E aña 1800 ta importante den historia pa e kosnan ku a pasa.

E kompania WIC, doño dje katibunan, ta bati bankrut i no por a hasi nada otro ku regalá gobièrnu di kolonia, Gobièrnu di Reino, tur su katibunan. Tur e katibunan ku durante 100 aña tabata katibu di WIC ta bira katibu di rei. Promé kos ku gobièrnu a hasi tambe tabata, eliminá e prohibishon pa hende liber establesé na Boneiru.

Anteriormente WIC no kier a mira ningun otro hende liber na Boneiru. Mesora kantidat grandi di hende di Kòrsou ta bin buska porvenir riba Boneiru.

Mayoria ta komersiante, trahadó, pero tambe hopi katoliko ku durante gobièrnu protestant na Kòrsou semper a keda ekskluí for di tur puesto den Gobièrnu.

Un di nan ta Papa Cornes (buki di Pastor Nooyen) kende Iglesia a apuntá pa hasi trabou eklesiástiko na Boneiru en espera di pastornan.

Algun akontesimentu

Tin algun akontesimentu importante den kua famia Pourier tabata embolbí atraves di

tempu. Por ehèmpel e promé matrimonio na Rincon.

Na aña 1872 e promé matrimonio sivil a tuma lugá na misa di Parokia di Rincon. Entre esnan ku a kasa tabatin Leonardus Pourier ku Pieter-nella Piar.

Den archivo tin registrá ku na aña 1868 Domein a peilu e siguiente kunukunan riba e siguiente serunan:

Rudolf Pourier, 2 bènder, serú Jacomel/serú Para Mira. Phelipe Pourier, 3 bènder, nòmber 'Zona', serú Pos Chikitu/serú Montagne.

Bernard Pourier, 6 bènder, nòmber 'Rigo' serú Baron/serú Bandera.

Hose Pourier, 2 bènder, nòmber 'Bandera', serú Montagne/serú Wassari.

Hose Pourier, #213, 3 bènder, serú Lasana/serú Baron.

Louis Pourier #524 i # 525 ku nòmber, 'de Bruin' Pierre Pourier, # 535, 'Victoria', 13 bènder.

Den nòmbernan di kunukunan nos a topa e kunuku yamá "Rigo" di Bernard Pourier.

E nòmber aki por ta orígen di e pensamentu ku ta fransesnan a biba aki, pero ta nada mas ku fam di kasá di Bernard Porier, ku tabata yama Maria Margaretha Rigaud, un mucha muhé, yu di Kòrsou.

Talbes e nòmber Victoria di kunuku di Pierre Pourier ta dediká na su ñetu ku yama Victoria, yu di Hose Maria Pourier i Julieta Frans.

E nòmber di kunuku 'de Bruin' di Luis Pourier por ta bini di e

fam de Bruin di Kòrsou ku tabata kasá ku un Pourier. Mes aña aki un persona ku yama Johannes Damasio Piar, alias Chery Maduro, a haña un tereno di 4 bènder.

Ken no konosé e piesa 'Mata e biná?' Chali Maduro por ta Chery Maduro ku a mata e biná?

Pouriernan riba e lista di Boneriano ku a bai traha na Sürnam.

Na aña 1905, ganando un florin pa dia di 9 ora di trabou.

Martinus Pourier number 5176

Felipi Pourier number 5280

Johannes Pourier number 5286

Pourier na Cuba

Petrus Paulus Pourier, dia 11 di ougùstùs 1920 a bai Cuba na bordo di 'Isabel'. El a bai pa 6 luna i tabata gana \$1,25 dollar pa dia. Tur siman \$1.25 tabata bai pa Constancia Pourier.


Dia 24 di ougustus 1920 na bordo di 'Albertina' ta bai Cuba Camuto Stephanus Pourier.

Algun otro kompañero tabata Antonio Petrus Marsera (Tommy) i e rumannan Johannes i Thomas Wanga i tambe Pedro Sint Jago.

Canuto ta laga un parti di su salario pa Johanna Pourier i Tommy pa su ruman Atalia.

A skibi e fam Pourier na tur sorto di manera: ku Pou, Poe, Pori, Porri, Porjerre.

Bernadette Heiligers



Miguel Pourier


Leven om te dienen

Miguel Pourier su bida tabata dediká na sirbi pueblo.



Miguel Pourier, riba e foto aki na edat hóben, tabata sin duda e Pourier ku a yega mas leu den su karera. Miguel tabata promé minister di Antia Hulandes.

MADAM X



Madam X gará!

Madam X aki no ta asina inosente manera e ta parse. E tambe tabatin su eskapada òf afènan amoroso. Mi mester ta honesto pa rekonosé esaki públikamente. Awor sí mi a bira hende serio. Un dje motibunan ta ku mi ta realisá ku mi balor di merkado a baha. Make-up no ta yuda mas i e kurpa aki riba su mes no ta kontrolabel mas. Kanamentu, landamentu i 'gym' no ta yuda mas. Karni a laga bai. Pero ten di mi ten mi tabata un negrita 'state of the art'. Hòmbernan tabata rondoná mi. Ora mi kana pasa na kualké lugá públiko mi tabata sinti kon wowo di hòmbènan tabata fihá riba mi. Kasi pa bora mi. Mi tabata konsiente ku mi 'trademark' tabata mi darièr. Bon formá, stret pará na mi kurpa. Pero esei ta 'vergame glorie'.

Den mi promé matrimonio mi tabata kasá ku Rudolf. Boso mester konos'é. E tabata mèneder di e negoshi Bagatel N.V. Un nèchi gai, manera nan sa bisa 'bon kabei' i 'bon koló'. E tabata ingeniero.

No tabatin motibu pa kòrta su orea. Mi tabatin tur kos. Pero lokura di mi parti, ko'i kabé habrí, a pone ku tòg m'a disidí di hasié. Amiganan ku mal astusia a siña mi ku bo no por kome spèreps tur dia. Tin ku vari'é ku un bon pida lomito. Òf pòrchòp. Òf un bon pida piská kòrá. Asina a sosodé loke nunca mester a sosodé, pero ku a sosodé.

Un dia na trabou – mi tabata traha na e kompania di seguro Siguransa N.V. e tempu ei – m'a sera ku Jairo, un kolega ku bon tipo. E kos a kuminsá masha simpel. Flert ku otro na trabou. Ora ku nos sa den e edifisio el a kuminsá ta pasa man den mi kabei òf para mi tras miéntras mi tabata sintá na mi buró ta traha. Masashi mi skouderan. Esaki tabata sosodé despues di trabou, ora ku tur hende a bai. Nos tabata keda pa supuestamente kaba sierto tareanan.

Despues den 'break' mèrdia nos a kuminsá ta sali bai kome i bebe algu na Mini Café den Playa. Pokopoko kos a kuminsá bira serio. Un dia nos a sali bai kome na Rendez Vous. Di mes Rudolf no tabata sa i naturalmente Jairo no a bisa su kasá Jennifer.

Nos a kere ku niun hende lo no a haña sa. Pero lubidá. No a dura masha ku nos a sigui sali i di mes rumornan a kuminsá sirkulá. Papiamentu. No redashi, pasobra loke nan tabata konta tabata bèrdad. Rudolf no ta kèns. El a kuminsá ta hala mi atenshon. Mi tabata nenga, traha e kara di mas inosente ku bo por imaginá bo mes. Kara di 'yo no fui'. Mi mester bisa ku m'a siña serka mi amiga Bertha, un dèskèn i baké den kòrtamentu di orea, kon bo mester saka duda for di bo hòmbèr ora ku e ta sospechá kòrtamentu di orea.

Loke sí Bertha no a siña Madam X ta ku nada no ta keda skondí,

foral riba nos dushi Boneiru aki. Un dia bo kasá òf partner ta gara bo, ni maske kiko bo hasi, bula'riba kai abou, ranka tur drachi di bo kabei.

Un dia Bertha a instruí: "Ora ku bo hasi e kosnan aki amiga bo mester usa bo kabes pa okultá loke bo ta hasi ku otro partinan di bo kurpa. Un òf dos dia promé di bo eskapada ilegal bo mester hasi lif k'e hòmbèr, karisi'é, keda yam'é dushi, mi amor ... Bo mester temper'é meskos ku bo ta temperá un bistek hasié moli. Ora e ta moli bo ta bis'é ku bo tin idea di sali ku un amiga. Keda vago. E lo no sospechá nada. Kere mi."

Mi no mester gaña. Mi no mester gaña. El a yuda un par di biá. Pero Bertha nunca a bisa ku nada riba e mundu aki lo keda skondí. Tur kos ta sali na kla un santu dia. Anke kon duru mentira ta kore, bèrdad ta hañ'é na kaminda.

Despues ku e kos a bai un par di tempu bon bo ta bira konfiá. I den e konfiá ei bo ta faya i ta gara bo. Kere mi! Asta mi tabata riska reta Rudolf, òf Dòlfi, manera mi ta yam'é, ku si mi tin un baisait e lo no gara mi nunca. Mi tabata blùf.

Te awe mi ta rekonosé den Dòlfi un hòmbèr super inteligente. Bon den hunga kèns, hasi komo sifuera e no ta ripará nada di mi aventura i eskapadanan, pa na e momentu apropiá, ku e 'timing' nesesario, aktua.

Un dia el a bai Kòrsou pa trabou. Djamars pa regresá djabièrnè. Pero e tabatin su kos bon pensá. Na lugá di djabièrnè el a bini djaweps ku e último buelo di ALM. Komo ku Jennifer kasá di Jairo nèt e dianan ei tabata ku fakansi na Hulanda, kosta tabata liber pa nos tur dos.

Mésun anochi ku Rudolf a biaha pa Kòrsou Jairo a aparesé na nos kas. E no a bini ku su mes outo. Di mes nò. Mi mes a bai busk'é pa nos pasa anochi huntu. Di djamars te djabièrnè. Tres anochi. Pero mi kasá a yega djaweps anochi i a gara nos den akshon espektakular.



Bon ku Dòlfi no ta hende violento òf agresivo. El a keda trankil i duna Jairo espasio pa disparsé. Pero di mes nos matrimonio a kibra na filingrana.

Mi konseho na parehanan kasá òf bibá. No biba ku ilushon ku lo no gara bo nunca den eskapadanan asina. Un dia bo number ta hunga. No balotá hende hòmbèr. Na un siguiente okashon lo mi konta boso kon mi number a hunga den mi siguiente matrimonio.

MONCHI & TONCHI

Tonchi ta kiko a bai robes ku madam x

Awèl si, awor si nan a gara madam x paso e no ta inosente manera e ta parse



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcendencia
Velli Gijsbertha
Edson Pietersz
Ibi Piar (deporte)

Layout
Maya Beaumont

Konsehero:
Bòl Antoin
786-6818
Aviso
avisobon@gmail.com


ARUBA

Chauffeur involvi den accidente fatal laga liber

ORANJESTAD -- E accidente di trafico cu a tuma luga diabierna anochi den Havenstraat pa 11'or di anochi, a laga un persona seriamente herida, esta Harwin 'Hawa' Ruiz di 31 aña, kende su dia siguiente a fayece pa herida serio ricibi y tambe e otro chauffeur involvi den e accidente, a keda deteni. Pa motibo cu e ta un oficial di Arumil, mesora Marachaussee a keda yama y a tuma over e persona aki pero aparentemente nan a keda cla caba cu e investigacion y ayera tardi a laga e persona aki bay liber.

Na prome instante tabatin e impresion cu e dos autonan tabata pustando cu otro y entre otro un di e autonan lo a cera e otro cu consecuencia cu e auto di Hawa a bay pega riba un baki di mata pa despues bolter, sacando e victima benta riba caminda. El a sufri hopi sla na cabes y el a bin fayece diadomingo den oranan di merdia.

No ta conoci si e otro chauffeur involvi lo tabata bebi of no y tampoco ta conoci si el a pasa test di consumo di alcohol na momento cu e tabata den detencion di Arumil.



KPA no por piki cacho riba caya ya cu no tin placa pa warda nan

ORANJESTAD -- Algun luna atras, leiding di KPA a dicidi di tene algun siman di curso pa oficialnan di Polis cu ta trahando como 'Polis di Bario' caminda eventualmente e grupo aki lo a wordo encarga cu e asunto di cachonan di caya. Manera ta conoci e situacion di cachonan los riba caya ta bira dia pa dia

mas serio, caminda pa falta di un solucion adecuado, e problema aki ta sigui bira mas grandi. Recientemente gobierno a anuncia cu dentro di poco lo inicia cu e proceso di piki cachonan riba caya y tambe bay over na multa doñonan di cacho pa motibo cu nan ta laga e animalnan aki "zwerf" riba caminda publico sin ningun

clase di control. Intencion di e proceso aki tabata pa laga Polisnan di Bario atende y castiga doñonan cu ta laga nan cacho cana riba caya sin ningun clase di control of cuido pero na mes momento tambe a menciona cu lo involvi personal di City Inspector den e asunto aki, pero en realidad ni polis di bario of

oficialnan di City Inspector, lo por haci algo cu e problematica aki.

Tin diferente asunto cu ta necesario, na prome luga ta rekeri un luga caminda lo tin cu hiba e bestianan aki, ya cu tin centronan cu ya a participa cu nan no por tuma tur e bestianan cu tin y loke ta mas principal, ta e aspecto financiero ya cu gobierno no tin placa presupuesta pa e tipo di proyecto aki.

Ta bin acerca cu polisnan no tin ekipo adecuado

pa piki e cachonan aki for di caya, ya cu tin dos auto na e momentonan aki cu ta encarga pa transporte di e cachonan di polis mes conoci como K-9 cual ya caba a ser dicidi cu no por uza e autonan aki pa e proyecto anuncia. Fuera di e asunto di 'hospedahe y transporte' tin e asunto di con lo identifica cachonan cu ta riba caya, con por haya sa ta kende ta nan doño y si tin legislacion caba si esaki por wordo castiga dor di duna e doño un multa.

Minister Geoffrey Wever ta felicita CBS

Aruba ganado di e Special Achievement in GIS Award

ORANJESTAD -- Centraal Bureau Statistiek Aruba ta ganado di e premio "Special Achievement in GIS Award 2023" duna door di ESRI. ESRI ta un compania global cu ta

lider den software di informacion geografico, e asina yama "Geographic Information System (GIS)". E GIS ta un sistema cu ta crea mapa cu diferente informacion aña di na esaki. Siman

pasa na San Diego ESRI a entrega premio na diferente paisnan ganado.

CBS Aruba a ricibi e premio "Special Achievement in GIS Award" door di a uza e sistema GIS pa facilita e preparacion di e ehecucion di e "Population and Housing Census 2020" y e publicacion di e resultadonan.

Sr. Randy van der Biezen y Sr. Richard Werleman di CBS a atende e user conference di ESRI na San Diego y a ricibi e premio pa CBS Aruba. Minister Geoffrey Wever ta extende palabra di felicitacion na henter e ekipo profesional di CBS cu e bunita logro aki!



HULANDA

Direktiva Volt ke Laurens Dassen komo lider polítiko

DEN HAAG – Direktiva di Volt a proponé Laurens Dassen pa sigui komo lider polítiko di e partido. E aktual presidente di frakshon anteriormente mes ya a bisa ku e ke sigui.

“Mi ta sinti e responsabilidadat i e urgensia pa laga tende e bos di Volt pa un Europeo fuerte, independiente i duradero,” Dassen di 37 aña a bisa.

Durante e elekshonnan di 2021, Volt a drenta Tweede Kamer ku tres asiento. E próksimo elekshonnan Dassen ta spera riba un dòbel na seis asiento di Parlamento.

Un di e tres asientonan a bai pèrdi na 2022 dor di retiru di Parlamentario Nilüfer Gündogan, despues di un konflikto di hopi tempu.

Den Eerste Kamer desde e aña akí tambe Volt tin dos asiento.

E prominente lider polítiko Dassen ta yama klima, siguridat di eksistensia i pèrdida di konfiansa den Den Haag, komo retonan polítiko grandi. “Awor mester bini un generashon di lider nobo ku ta riska pa mira futuro ku optimismo.”



Pa abogadonan nobo di Taghi

Korte ta rechasá petishon pa èkstra tempu

AMSTERDAM – E douan Taghi no ta haña abogadonan nobo di Ri-èkstra tempu di nueve luna pa suspenshon den e kaso, Korte di Amsterdam a di-



sidi. E abogadonan a pidi Korte siman pasá pa èkstra tempu pa prepará nan mes den e proseso Marengo.

Segun Korte, e interes ta pisa mas tantu pa laga e kaso sigui mas aleu sin retraso. Anteriormente ya tabata kla ku un veredikto den e kaso si lo tabatin retraso. Korte ta bisa awor ku ta trata di algun luna, pasobra e abogadonan ke sufisiente tempu pa prepará nan mes.

Na aprel a detené e abogado anterior, Inez Weski, riba sospecho di pasa informashon di i pa Taghi. Ta sospech’é di partisipashon

den un organisashon kriminal. E ta liber atrope, pero debí na su detenshon, e mester a laga su defensa kai. Dor di esei Taghi a bin resultá sin abogado. Weski ta keda sospechoso.

Resientemente tres abogado a mèldu nan mes. Nan a pidi pa suspenshon pa por studia e dokumentonan. E proseso di likides di Marengo ta andando ya pa sinku aña i entretantu den su fase final.

Korte ta planiá pa duna su veredikto dia 20 di òktober. Anteriormente e luna akí Korte a anunsiá ku no ta bai logra e fecha akí.

Roosmarijn Knol ta bira muhé di wer nobo di NOS

HULANDA -- Roosmarijn Knol ta bira e muhé di wer nobo di NOS. E ta sigui Gerrit Hiemstra kende na mei a anunsiá ku e no ta sigui mas komo hòmber di wer.

Knol di 25 aña a studia den direkshon di meteorologia i kalidat di aire na Universidat di Wageningen. Dia promé di sèptèmber e ta kuminsá ser-

ka NOS ku un edukashon interno i ta spera ku e último kuartal di e aña akí e lo aparesé pa promé biá na radio i televishon.

Knol aktualmente ta den servisio di Weerplaza. Ei nan e ta presentá wer pa entre otro Omroep Gelderland i Omroep Brabant.

Tambe e ta traha video di splikashon tokante

aparishonnan di wer riba YouTube.

Knol: “Na Hulanda wer i klima regularmente ta temanan di kombersashon, na trabou, ku famia i ku desconosinan. E presentadó di wer ta duna un kontribushon importante i mi ta mira dilanti pa tin kontakto tokante e tema akí ku e oyente òf televidente.”



Radulphus College ta e gran ganadó

CBCS ta hasi entrega di 'BEST ECONOMIC RESEARCH AWARD 2023'

WILLEMSTAD — E aña akí pa di tres biá Centrale Bank van Curaçao en Sint Maarten (CBCS), a hasi entrega di su 'Best Economic Research Award' (BERA) na studiante di skol sekundario i universitario. Pa bini na remarke pa e premio, e studiantenan di HAVO i VWO na Kòrsou i Sint Maarten, tabatin ku entregá nan tarea di profil pa e materia ekonomia.

E studiantenan na nivel di bachelor i master, tambe por a kompetí ku nan tésis di graduashon. Radulphus College a sali komo e gran

ganadó e aña akí, risibiendo e premio tantu na e nivel di HAVO komo di VWO.

Meta di 'Best Economic Research Award' ta di stimulá investigashon ekonómiko enfoká riba ekonomia chikitu i habrí, partikularmente Kòrsou i Sint Maarten. Pa e di tres edishon di 'Best Economic Research Award', a purba di hisa tantu e kantidat komo e kalidat di e proyektonan partisipante. Ku e meta ei, CBCS a organisá seshon informativo pa e dosentenan di ekonomia di e skolnan sekundario na Kòrsou i Sint

Maarten i tambe un enkuentro informativo pa e studiantenan di HAVO i VWO.

Fuera di esei, a adaptá e fechanan pa entrega di e proyektonan di kada kategoria, pa esakinan kuadra mihó ku e kalènder di skol i di universitat. Entre otro danki na e esfuerso i entusiasmo di e skolnan sekundario, e aña akí a risibí un total di 27 tarea di profil, 20 di HAVO i 7 di VWO. Den e kategoria bachelor, CBCS a risibí sinku tésis.

Un hurado presidí pa Dr. José Jardim i integrá pa Drs. Alberto Romero,

Drs. Eugene Holiday i Drs. Eric Matto, a evaluá e investigashonnan presentá. E evaluashon a tuma lugá a base di metodologia, originalidat i kreatividat, abilidad di skirbi, layout i relevansia, teniendo kuenta ku nivel di kada kategoria.

Na nivel di HAVO, e hurado a otorgá e premio pa e mihó investigashon ekonómiko na Trevor Borgschot i Kenzo Jordaan di Radulphus College, pa nan tarea 'De Toekomst van cryptogeld op Curaçao'. E 'Best Economic Research Award' na nivel di VWO, a bai pa Giada Cecchini i Cristhal Fecunda, tambe di Radulphus College.

Nan tarea ta titulá 'Basismand: afschaffen of behouden?'.

Por último, na nivel di bachelor, e hurado a otorgá e premio na Susheena Bishop di Inter-Continental

University of the Caribbean, pa su tésis di graduashon titulá 'Factors influencing cryptocurrency usage intention in Curaçao'. Entrega di e premionan a tuma lugá djabièrnè 14 di yùli den auditorio di CBCS. Na e okashon, e ganadónan a hasi un presentashon di nan proyekto.

Tin suma kèsh tambe mará na e premio. Na nivel di HAVO i VWO, e outornan di e proyektonan ganadó a risibí 2.500 florin i e skol di e ganadónan den kada kategoria a risibí un premio di 5 mil florin. Na nivel di bachelor, e outor di e mihó tésis a risibí un premio di 5 mil florin. Por último, tantu e partisipantenan komo e skol ganadó a risibí un trofeo.

CBCS ta deseá e partisipantenan tur klase di éksito, tantu den nan estudio komo despues den nan karera.



STATIA/SABA/ST. MAARTEN

Selebrando ku e tema 'Nos ta un famia'

Parada uniformá Dia di Hustisia



Komienso di skrinen di Kanser na pechu na St.Eustatius

STATIA -- E luna di yùli akí, e programa piloto pa skrinmentu di poblashon pa kanser na pechu ta kuminsá na Sint Eustatius. Den e dos añanan ku ta bini, ta bai invitá tur hende muhé entre 50 i 75 aña pa partisipá. Inisio di e programa di skrinen akí na Sint Eustatius ta resultado di kolaborashon entre RIVM, The Public Health Prevention Clinic (PHPC), i St. Maarten Medical Center (SMMC). Detekshon tempran ta esensial pa tratamentu eksitoso i hopi biaha ta enbolbí intervenshon ménos invasivo. Si detektá kanser na pechu tempran, tin mihó chèns tambe pa sobreviví.

Intake

Durante e periodo di dos aña, The Public Health Prevention Clinic ta yama tur hende muhé den e grupo di edat i invitá nan pa un sita di intake. Durante e intake, e koordinadó di skrinen ta splika e proseso inkluso logístika, i kada partisipante ta risibí tur informashon tokante e programa di skrinmentu pa kanser na pechu. Partisipantenan ta biaha den

grupo di ocho ku un buelo charter pa St. Maarten. Skrinmentu ta tuma lugá na SMMC riba djáron, un òf dos biaha pa luna i partisipashon ta grátis.

Kalidad konfiabel

A trein e téknikonan di laboratorio na St. Maarten Medical Center pa hasi e mamografianan (radiografia). E Sentro di Ekspertisio Hulandes pa Skrinen ta responsabel pa nan entrenamentu i kalidat di e skrinen.

Akuerdo pa post-kuido

A yega na un akuerdo ku St.Eustatius Heath Care Foundation i St.Maarten Medical Center tokante post-kuido. The Public Health Prevention Clinic ta

informá e hende muhé nan ku a skrin tokante kualke apnormalidat ku a detektá i lo referí nan tambe na spesialistanan na St. Maarten Medical Center pa tèst adishonal. Nos ta purba haña un sita siguiente dentro di un siman. Dependé di e resultado, SMMC ta regla tèst i tratamentu adishonal si ta nesesario.

Mas Informashon

Pa mas informashon tokante e programa di skrinmentu di pechu, tuma kontakto ku The Public Health Prevention Clinic na +599 318 28 91 of bishitá página di Facebook Bevolkingsonderzoek Caribisch Nederland.



DEPORTE

Famia Alberto a lanta dos tim di bolas

KRALENDIJK -- Famia Alberto a lanta dos tim di Bolas. Ta asina ku famia Alberto a sera mas ku otro i awor nan ta hunt kasi tur dia. Despues a bai un dia kantu di bich pa un reflekshoná, awor nan ta hunt den bolas komo un famia

E famia ta pidi tur esnan ku ta organisá tantu bo-

las komo vòlibòl di bichi, pa tuma kontakto ku Mario Alberto, Dyan Alberto, Christine Alberto, òf Cado Alberto.

E famia ta sumamente kontentu di a uni ku otro i ta spera di keda hunt asina pa semper. Keda pendiente, pasobra tin mas kos bon i positivo na kaminda di e famia



Feyenoord ta bula ku anterior avion di Lufthansa

KRALENDIJK/ROTTERDAM -- Feyenoord a bula djamars mèrdia desde The Hague Airport na Rotterdam direkshon Oustria. Ei nan e ekipo tin un kamapamentu di treinen pa preparashon pa e temporada nobo.

E selekshon, ku hopi biá ta hasi uso di aeropuertonan di Zuid-Holland, a subi bordo di un CRJ-900

ku registrashon OY-MIT.

E avion a aterisá djamars mainta for di Praag. Banda di 3'or di mèrdia e tim di Arne Slot a sali pa Salzburg. Via Utrecht e avion a pone rumbo direkshon Oustria pa aterisá un ora i dies minüt mas lat.

Desde ougùstùs 2021 e kompania di aviashon danes, Global Reach Aviation, ta operá e avion. E

kompania ta disponé di dos avion ku ta ofresé asiento na 48 i 78 biahero.


E empresa, establese na Billund, ta realisá buelo charter pa gobièrnunan, petishonnan direpente i ekiponan deportivo. E OY-MIT ta bula prinsipalmente dentro di Europa. Promé ku e tempu ei, e avion tabata operá pa Global Reach Aviation i despues Lufthansa.

Na yùli 2006 e kompania di aviashon a buska e CRJ-900 i tabata operá komo Lufthansa CityLine.

Ku un delegashon di 27 persona, e ekipo a subi e CRJ-900. Tin falta di dos nòmber den e ekipo di Slot, Gernot Trauner ta rekupeando di un leshon, miéntras Santiago Gimenez ta na Méxiko pa hunga e final di Gold Cup kontra Panamá.

Na e kamapamentu di treinen Feyenoord ta hunga un partido amistoso kontra TSG 1899 Hoffenheim di Alemania. Durante e preparashon riba e temporada nobo di futbòl, e ekipo di Rotterdam a gana PEC Zwolle 3-1, Club Brugge 2-0 i empatá ku Union Sint-Gillis 0-0.

Djasabra benidero e kampion nashonal ta bula bèk pa Hulanda. Despues e ekipo di Slot ainda ta hunga kontra Villarreal i Benfica. Dia 4 di ougùstùs Feyenoord ta hunga un partido pa e Johan Cruijff Schaal kontra PSV.



Promé edishon 'Summer Baseball 5'

KRALENDIJK -- E organisadónan di e promé "Summer Baseball 5", ta pidi pa prepará pa esaki, e promé edishon di esaki ku pa promé bia ta keda organisá riba nos isla.

Ta trata di un Summer Baseball Open Championship Bonaire.

Esaki ta tuma lugá 2 di ougùstùs pa 13 di ougùstùs 2023.

Kategorianan.

E kategorianan ku por partisipá:

Minor (9 – 11 aña).
Little (12-14 aña).
Junior (15 – 18 aña).
Women (18+).
Men (17+).

Lo por tin un máksimo di 6 tim pa kada kategoria.

Pronto lo publiká e Link ku por usa pa registrá.

Pa mas informashon por hasi uso di

E-mail: info@fbsb.org
org i tambe por yama tel. (+599)784 4997.

Resultado dominó djamars

KRALENDIJK -- Djamars último 18 di yùli 2023 aya na Rincon, tabatin kontinuashon di kampionato dominó di Rincon organisá pa e federashon di Rincon bou di e maestro señor George Kroon. Riba e dia aki tabatin e siguiente partidonan ku e siguiente resultadonan.

Real Dynamite vs Geza

a finalisá 4-3 pa Geza.

E partido Sparta vs Strea di Oro a finalisá 6-3 na favor di Sparta. E partido entre e ekiponan Los Amigos i Elite a finalisá den empate di 3-3. E último resultado ta keda definí despues.

Esaki di akuerdo ku e informashonnan di George Kroon ku a yega nos redakshon.

Koral di kachu gròf

Koral, meskos ku anemon di laman, gorgon i kwal, ta pertenesé na e grupo di selentéreo, animal ku kavidat interior, un di e promé sortonan di koral ku bo ta topa ora bo drenta laman ta koral di kachu gròf. E ta krese serka di kosta kaminda tin hopi aktividat di ola. Bou di sirkunstansia favorabel koral di kachu gròf ta krese ocho pa dies sentimeter pa aña, loke ta masha lihé pa koral .

Hopi bes base di e kachu ta muri. E kalki sunú ku ta sobra den korto tempu ta keda kubrí ku lima di kalki, pero organismo ku ta bora buraku manera por ehèmpel spòns o mosel boradó, tambe por bin establecé riba dje. E último nan aki ta bora drenta koral morto debilitando base di e kolonia di koral ta loke pone ku e ta kibra fásil ora ola dal den dje.

No ta pòrnada nan ta krese asina lihé. E pidanan bibu di e koral ku a kibra por krese kolonia nobo atrobe, basta nan haña chèns di pega den fòndu di laman. Di aserka por nota ku e bestianan di koral individual o polip, ta forma tubu chikitu konektá ku otro. Kaminda e koral akí ta krese, e ta protehá kosta kontra efektonan di ola desempeñando asina un papel importante den prevenshon di eroshon.

Fuente/foto:
Ellen Muller

BIDA
DEN
LAMAM



Backpack
Beach Chair

SPECIAL PRICE
\$89



Summer
Vibes



3-Burner Gas Grill

\$309

20L Backpack

\$89.95



LG Bluetooth
Party Karaoke Speaker

\$259

